

KEIZERSGRACHT NUMERO SINKO I SEYS.

Awe m'a kana kant'i awa
 awa pretu i stinki di chiké
 i den e spil di skuridat
 mi a mira kla e tempelman
 di tempunan k'a bay perdí.
 P'atras di mi lomba
 pyedr'i fòrnu
 ta plama aroma di rikesa.
 Dilántimi piská morto ta drif
 konsekwensya bárbaro di un tal Mamon.
 Den mi, den veneno di mi sèsu
 Kòrsòw ta yora su kuna di historya:
 Bas ta kwantu bo no a eksplotá
 pa para bira adorno pa turista ?
 Pyedra pakiko bo n' ta protestá,
 pa ki bo n' ta grita bèrdat
 pa Canon, Yashicanan tende ?
 Bisa numa ku bo ta pagá
 ku plaka di abusu, plaka kolonyal !
 Awe m'a kana kant'i awa
 awa pretu i stinki di chiké
 i den un spil di skuridat
 mi a mira tempelman
 di tempunan perdí

BUSKA TRABOW.

Lantabo mañán trempán
 bai kòrta palo
 pa Buchi Wan
 i kòrda bai kumpra pan
 na panadería
 di Shi Catán

Na nòmber di Tata Dios
 mi ta pidibo
 mi kurasón
 di kòrda ku sin trabòw
 no tin kuminda
 ni nos amor

Ai Pedro, pasami awó
 e bòter grandi
 di ròm Palau
 i bin ban lora aki bòw
 pa mi trosebo
 i burusí te mardugá
 i burusí te mardugá
 i burusí te mardugá